



BILTEN

br. 14

August 2015.


Ševval / Zu-l-ka'de 1436.h.g.



M MOJ IDENTITET
E KTEB



KURBAN
2015



1700 SEK



BAJRAM ŠERIF
MUBAREK OLSUN!

www.izb.se
Potražite nas i na facebook-u
Islamska zajednica Bošnjaka u
Švedskoj

SADRŽAJ

- Impresum
- Uvodnik

Aktivnosti IZBUŠ-a

- Održana sjednica Izvršnog odbora

Džematske aktivnosti

- Trelleborg: Aktivnosti u džematu
- Halmstad: Da se nikada ne zaboravi Srebrenica

Akcija Kurban 2015

Hutba:

- "Škola je farz", hatib Izet-ef. Čamdžić

KÄNNER DU TILL
DEN ANDLIGA VÅRDEN
PÅ SJUKHUS FÖR
MUSLIMER?

MUSLIMSKSJUKHUSKOORDINATOR.SE

NBW
NYKTERHETSRORELSENS
BILDNINGSVERKSAMHET



BILTEN

Informativno glasilo

Islamske zajednice Bošnjaka u
Švedskoj

GLAVNI UREDNIK

Idriz-ef. Karaman
glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:
Nezir-ef. Špiodić
Smajo-ef. Šahat
Elvedin-ef. Bešlija

POZIV NA SARADNJU

Oglasite se i Vi u Biltenu IZB u
Švedskoj!

Javite nam se sa vašim tekstom,
prijedlogom, primjedbom i
sugestijom.

e-mail: bilten@izb.se

UVODNIK



Idriz-ef. Karaman

Ovih dana priveli smo kraju prikupljanje izvještaja o mektebskoj nastavi i akciji uplate zekata i sadekatu-l-fitra.

Ispunjeni zadovoljstvom postignutim rezultatima, ovaj Uvodnik posvećujemo onima koi su najzaslužniji za ostvarene rezultate – našim imamima.

Kad je u pitanju mektebska nastava, u protekloj godini imali smo najveći broj upisanih polaznika u posljednjih pet godina. Pored 1 585 upisane djece, solidan broj je i odraslih sa kojima naši muallimi rade.

Što se, pak, akcije uplate zekata i sadekatu-l-fitra tiče, iako je ogroman broj naših džematlija ramazan proveo u svojim rodnim krajevima i tamo izvršio ovu obavezu, ovogodišnja akcija je u odnosu na prošlu godinu uspješnija za preko 500 000 kruna. Posebno je impozantan rezultat u prikupljanju zekata. Zapravo, od kako je osnovana Islamska zajednica Bošnjaka u Švedskoj nikada nije prikupljeno više zekata – čak preko 1 000 000 kruna.

Zbog toga ovom prilikom za ove izvanredne rezultate želimo odati priznanje našim imamima, s tim da ovo priznanje neće umanjiti doprinos rukovodstava džemata, kao i naših vrijednih džematlija, jer je ovo u suštini njihov uspjeh.

Allah mubarek olsun!

Idriz-ef. Karaman

Preporod
ISLAMSKE INFORMATIVNE NOVINE



Allah neće izmijeniti
starje jednog naroda
dok taj narod ne
promijeni sebe
(Kur'an)

www.izb.se

U JÖNKÖPINGU ODRŽANA SJEDNICA IZVRŠNOG ODBORA ISLAMSKE ZAJEDNICE BOŠNJAKA U ŠVEDSKOJ



U subotu, 22. avgusta 2015. godine, u Jönköpingu je održana sjednica Izvršnog odbora Islamske zajednice Bošnjaka u Švedskoj.

U prvom dijelu sjednice analizirani su dostavljeni izvještaji glavnog imama, sekretara i blagajnika za protekli period. Izraženo je zadovoljstvo postignutim, a posebno rezultatima mektebske nastave i akcijom prikupljanja zekata i sadekatu-l-fitra.

Izvršni odbor je usaglasio program Savjetovanja sa predstavnicima džemata, koji će se održati 5. septembra u Jönköpingu.

Što se tiče planirane manifestacije obilježavanja 20 godina IZBUŠ u oktobru 2015. godine, konačni program bit će utvrđen u dogovoru sa našim džematom u Stockholmu.

Izvršni odbor je još donio odluku da se seminar za predstavnice naših džemata održi jedan od prva dva vikenda u novembra. Radna grupa Izvršnog odbora će sa predstavnicom žena Melinom Mahmutović dogovoriti detalje ovog skupa.

Izvršni odbor je na kraju zahvalio džematu domaćinu za izuzetno gostoprimstvo i omogućene uvjete za održavanje sjednice, kao i svih drugih skupova IZBUŠ.

I.K.



AKTIVNOSTI U DŽEMATU TRELLEBORG



U džematu Trelleborg u proteklom periodu organiziran je niz vrlo zanimljivih događaja i aktivnosti. Između ostalog, svečano je otvoreno muslimansko mezarje u ovom gradu. Ovom historijskom činu prisustvovali su predstavnici općine, Švedske crkve, članovi Odbora BIZ Trelleborg, na čelu sa predsjednikom Rifatom Zejnilovićem i imamom Ersin-ef. Dupljakom. Mezarje je otvorio i proučio dovu glavni imam IZBUŠ Idriz-ef. Karaman.

Pred kraj mjeseca ramazana, na inicijativu Odbora BIZ Trelleborg, organiziran je zajednički iftar. U veoma ugodnoj atmosferi iftaru je prisustvovalo pedesetak džematlija, a poslije treavih-namaza uslijedilo je druženje sve do sehura.

11. jula predsjednik džemata Rifat Zejnilović održao je zapažen govor povodom obilježavanja 20 godina od genocida i stradanja u Srebrenici. Također, na inicijativu Rifata Zejnilovića, džemat je, uz koordinaciju i pomoć komune Trelleborg, Švedske crkve, te grupe „Alla likas värde“, postavio izložbu povodom genocida u Srebrenici. Izložba je postavljena u gradskoj biblioteci Trelleborg i mogla se vidjeti naredni mjesec dana. Posjetioци izložbe bili su u prilici pogledati fotografije masakra i egzodusa našeg naroda u Srebrenici, te se upoznati sa Bošnjacima, njihovim radom i učešćem u svakidašnjem životu u Trelleborgu.

Članovi Odbora pokrenuli su još jednom akciju: „Budi i ti član BIZ Trelleborg“. U toku mjeseca septembra i oktobra članovi Odbora će nastojati obići što veći broj džematlija i uključiti ih u članstvo i aktivnosti u džematu. Inače, broj članova je, hvala dragom Allahu, dž.š., u stalnom porastu.

DA SE NIKADA NE ZABORAVI – SREBRENICA!



U subotu, 11. jula 2015.g., oko stotinjak osoba okupilo se u Norre Katts parku u centru grada Halmstada. Dvadeset godina poslije počinjenog genocida u Srebrenici i u švedskom gradu Halmstadu organizovana je manifestacija na kojoj se govorilo o genocidu i stradanju Bošnjaka, muslimana. Program je održan na švedskom jeziku.

Manifestacija je organizovana u saradnji dvije organizacije SMFR (Svenska muslimer för fred och rättvisa) i Halmstad för alla.

Pristunima su se obratili Amina Boulaabi, koja je 1992. u svojoj 14. godini sa roditeljima došla u Švedsku iz Srebrenice. Tri godine poslije ubijeno je preko 8000 muslimana, muškaraca i dječaka u Srebrenici i okolini Srebrenice.

Pored Amine, obratio se i Alexander Bengtsson, koji radi za novine "Expo" i Sumeyya Gencoglu, predsjednica udruženja SMFR-a u Halmstadu.

Te posljednji se obratio imam džemata Halmstad, Almedin-ef. Spahić koji je poslije zapaženog govora, završio dovom i zajedničkim učenjem fatihe.



KURBAN 2015

Cijena ovogodišnjeg kurbana za Švedsku u akciji koju vodi Rijaset Islamske zajednice u BiH je 1700 SEK.



**Krajnji rok za uplatu kurbana je
18.09.2015.g.**

Važno: Rijaset nema mogućnost da dostavlja trećinu kurbana po cijeloj BiH. Svi uplatioci kurbana koji žele da neko od njihove rodbine preuzme trećinu kurbana (može se preuzeti samo u Sarajevu), trebaju dostaviti telefonski broj rodbine kako bi predstavnik Rijasetu mogao stupiti u kontakt i dogovoriti detalje oko preuzimanja trećine kurbana.



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

KURBAN 2015



1700 SEK

Uplatiti kurban preko Islamske zajednice

Smisao i svrha klanja kurbana

Riječ "kurban" izvedena je iz glagola riječi "karrebe", što znači "približiti se".

Ovim nazivom Allah dž.š. određuje smisao i cilj klanja kurbana - približiti se Allahu dž.š., Njegovoj milosti, zadovoljstvu, oprost i zaštiti. Allahu dž.š. nije potreban kurban, meso ili krv. On je neovisan od toga. On od nas želi bogobojaznost, pokornost i blizinu. Samo od takvih, bogobojaznih, kurban će biti primljen.

Mudrost izvršavanja ovog propisa jeste u tome da se čovjek nauči žrtvovati na putu svoje vjere, zajednice i domovine, za dobro svih ljudi. Kasnije, svaka druga žrtva života, ne predstavlja poteškoću.



Po mišljenju većine pravnika jedna ovca je dovoljna za kompletnu porodicu.

Na to nam ukazuju mnogi argumenti:

Imam Muslim je u svom Sahihu zabilježio hadis od Aiše r.a. da je Poslanik s.a.v.s. govorio pri klanju kurbana: **"Bismillahi, o Gospodaru, primi od Muhameda i njegove porodice."**

Većina pravnika je smatrala dozvoljenim da sedam osoba učestvuje u klanju jedne krave ili deve. Na to nam ukazuje hadis kojeg je zabilježio imami Muslim od Džabira da je kazao: **"Mi smo zaklali sa Poslanikom, godine u kojoj je bila Hudejbija, devu za sedam i kravu za sedam osoba."**

PROPISI O KURBANU

Allah dž.š. u Suri **Kevser** kaže:

"Mi smo ti uistinu, mnogo dobra dali, zato namaz radi Allaha klanjaj i kurban kolji, onaj ko tebe mrzi sigurno će on bez pomena ostati!" (El-Kevser, 1-3)

Kurban je jedna u nizu vadžib dužnosti koja ima svoj veliki značaj. Muhamed a.s. je rekao: **"Onaj ko ima materijalne mogućnosti da zakolje kurban, a ne zakolje ga, nemoj da se približava mjestu na kojem mi obavljamo namaz."**

U žrtvovanju kurbana ogleda se velika solidarnost muslimana, jer kurbansko meso se dijeli, siromasima, rodbini, komšijama i potrebnima. Allah dž.š. kaže: **"Jedite od nje (žrtve) i nahranite bijednika i siromaha."**

U ustanovi kurbana krije se prava socijalna svrha i najviši znak požrtvovanosti u ime viših ciljeva.

Uplatiti kurban preko Islamske zajednice

Kad se smatraš obaveznim zaklati kurban?

Žrtvovanje kurbana za vrijeme kurban-bajrama je islamska dužnost svakog imućnog punoljetnog muslimana i lijepa islamska tradicija i dobro djelo za onoga ko nije obavezan.

Dovoljan je jedan kurban za članove jedne porodice. U današnjem vremenu to je svaki onaj koji je zaposlen i ima toliko sredstava u dane kurban-bajrama da obezbjedi kurban.

Kako uplatiti kurban preko Rijaseta?

Familija ili pojedinac koji nisu u mogućnosti sami zaklati kurban mogu to učiniti uz pomoć Rijaseta tako što će svoj kurban uplatiti preko svoje lokalne Islamske zajednice (džemata).

Rijaset Islamske zajednice u Bosni i Hercegovini svake godine, blagovremeno, informiše sve lokalne zajednice o cijeni kurbana.

Zašto preko Rijaseta?

Iz prostog razloga što je jedini siguran način uplaćivanja, jer ispunjava sve uvjete fetve, koju je prije nekoliko godina izdalo Vijeće za fetve Rijaset Islamske zajednice u BiH.

Značajno je, također, naglasiti da se svi kurbani, koji se kolju u organizaciji Rijaset, nabavljaju u BiH. Velikim dijelom od povratnika. Dakle, na taj način se stimuliraju domaći poljoprivrednici, a posebno povratnici.

Ove i narednih godina Islamska zajednica u fokus stavlja povrtanička mjesta u gornjem i srednjem Podrinju, istočnoj Hercegovini, zapadnoj Bosni i zapadnoj Hercegovini, gdje će kurbane otkupiti od povratnika koji se bave uzgojem stoke, zaklati ih, a onda podijeliti u povratnicima.

Za više informacija možete se obratiti lokalnom džematu, imamu ili sekretaru IZB u Švedskoj:

E-mail: kontakt@izb.se

tel. 0520-499064

mob. 0763-102447

Uplate možete izvršiti u svojim džematima ili direktno na račun IZBUŠ-a

PG 54 44 14 - 6

HUTBA: "ŠKOLA JE FARZ"



Izet-ef. Čamdžić, Zavidovići - BiH

Poslanik upozorava sve nas da ćemo kad pred Gospodara našeg stanemo pitani biti: Kako si mladost proveo? Ta mladost, to je značajan, rekao bih najznačajniji period života našeg, jer od proljeća, od sjetve zavisi jesen. Ako se proljeće iskoristi i u zemlju sjeme baci, nadati je se plodu u jesen i mirnoj, spokojnoj zimi. Ako se mladost protrati, ako to vrijeme prođe u ništa, čemu se nadati u životu, i u kakvu budućnost koračati?

Na početku smo školske godine. To je izuzetna prilika da se ove Poslanikove opomene o odgovornosti za mladost prisjetimo i da se prisjetimo uputa i savjeta iz izvora naše vjere koje nas tjeraju da budemo aktivni, da učimo i radimo kako bi i sebi i društvu i ummetu sreću i napredak donijeli. Allah dž.š., je prvim riječima upućenim Poslaniku, a preko njega čovječanstvu, naredio da učimo i to u ime Gospodara koji stvara.

Naredio nam je da stičemo znanje, ne samo radi bolje plate i života ugodnijeg koji bismo eventualno zahvaljujući tom obrazovanju imali, već da bi bili bolji vjernici i na Božijem putu stabilniji. Allah dž.š., to objašnjava u ajetu kao što je: „Allaha se najviše boje učeni ljudi.“(Fatir 28). Zatim u pitanju: „Reci, jesu li isti oni koji znaju i oni koji ne znaju.“(Zummer 9). I u obećanju: „Allah će na visoke stepene uzdignuti one među vama koji vjeruju i kojima je dato znanje.“(Mudžadele 11).

Poslanik je lično, i primjerom i riječju stalno podsticao ljude da napreduju, da uče, da stiču znanje i da se u dobru natječu. Još u Mekki, u Erkamovoj kući, od samog početka objave podučavao je ashabe vjeri i njenim propisima. Podučiti se vjeri i propisima njenim je važno, vrlo važno jer vjera dolazi radi oba svijeta. Propisima nam uređuje život i vodi nas spasu. Poslanik kaže: „Kome Allah dž.š., želi dobro, omogući mu razumijevanje vjere.“(Mutefekun alejhi).

U Medini je Poslanik na sofi džamijskoj otvorio školu i podučavali su se tu sljedbenici njegovi, ne samo vjeri, već naukama svim. Bila je to škola u kojoj će i zarobljenici Bedra, mušrici mekkanski biti učitelji. Musliman je obavezan, to nam Poslanik kazuje, učiti od svakog i svugdje. „Mudrost, znanje je izgubljena stvar muslimana i gdje god je nađe, uzme je.“(Muslim). To znanje treba ići i u Kinu tražiti govorio je Poslanik i naređivao svakom muslimanu i muslimanki da znanje traži.

Nauka, znanje nam omogućava da resurse ovosvjetske ispravno koristimo, da snažni budemo i da nikom osim Stvoritelju ne robujemo. Toliko insistiranja na obrazovanju i toliko pohvala znanju u izvorima vjere nam i jest zato da bi ummet bio ono što treba biti, da bi bio najbolja zajednica ljudi koja naređuje dobro a od zla odvraća.

Sad kad novu školsku godinu iščekujemo, nužno je osvrnuti se oko sebe i vidjeti da još uvijek drugi upravljaju s nama i resursima našim raspolažu i da mi za račun tih drugih krv našu proljevamo. Ti, dječake i djevojčice, ti mladiću i djevojko, ne možeš otići i riješiti izbjegličku krizu i zbrinuti stotine hiljada emigranata koji traže spas bježeći iz Sirije, Iraka...Dug ti je prema njima i obaveza prema Bogu i Poslaniku Njegovu prihvatiti se knjige, prihvatiti se posla i biti u svemu dobar, ako je moguće, biti najbolji.

Osim dunjalučke ugone ima tu, u sticanju znanja i ahiretske nagrade. Ona treba da nas motivira i vuče naprijed, da nas usmjerava ka knjizi i školi. Poslanik obećava: „Ko krene stazom sticanja znanja, Allah će mu olakšati put u Džennet. Meleki prostiru svoja krila milosti tražiocu znanja, zadovoljni onim što čini. Učenu čovjeku oprost traže i stanovnici zemlje i stanovnici nebesa, čak riba u vodi i mrav u svome skloništu. Prednost učenog vjernika nad neukim pobožnjakom je kao prednost moja nad jednim od vas. Učeni su poslanicima nasljednici. Poslanici nisu iza sebe ostavili ni dinare ni dirheme. Ostavili su znanje, pa ko ga uzme, uzeo je najbolje.“ (Ebu Davud, Tirmizi)

Mi vjerujemo i znamo da Poslanik govori istinu. Potpuno smo ubjeđeni da ćemo za mladost, kako smo je proveli i u šta iskoristili, odgovarati. Za vjernika nema prostora očaju, beznađu, bezvoljnosti. Ne smije vjernik pomisliti da on nije vrijedan, da ne može ništa učiniti i da je nemoćan bilo šta promijeniti. Nikako ne smije sebi dopustiti da neko drugi o njemu brine i da čeka da neko drugi njegove probleme riješava. A mnoge je mladih u redovima našim koji upravo tako razmišljaju i druge krive za svoj neuspjeh. Izlaz vide u odlasku, u bijegu od zavičaja i domovine. Treba znati da je vjerniku obaveza pobjeći od ljenosti, bezvoljnosti, obaveza mu je pobjeći od čekanja, beskonačnog čekanja rješenja i stalnog nadanja boljim vremenima.

Jedan je sudija koji sudi na sudu za maloljetnike napisao: „Mi stalno slušamo plač i jadicovke mladih koji pitaju: 'Šta da radimo, kuda da idemo?' 'Moj odgovor njima je sljedeći: 'Idi kući, pokosi travnjak, operi prozore, nauči da kuhaš, napravi splav, nađi neki posao, posjeti bolesnika, uči školske lekcije, a kad sve to završiš, čitaj neku knjigu. Grad u kojem živiš ne duguje ti rekreativno-sportske sadržaje i objekte, a tvoji roditelji nisu dužni da te zabavljaju. Svijet nije dužan da te izdržava, ti si ponešto dužan svijetu. Drugim riječima, odrasti, prestani biti plačljiva beba, probudi se iz svog svijeta snova i maštanja i razvijaj snagu volje a ne snagu želje. Počni se ponašati kao odgovorna osoba. Ti si važan i ti si potreban nekome. Prekasno je da samo sjediš i čekaš na nekoga da uradi nešto, nekad. Nekad je sad, ovaj tren, a taj neko si ti.“

Uzvišeni Bože, učini nas svjesnim važnosti svakog dana kojeg si nam podario. Učini nas svjesnim da ćemo za svaki tren proživljeni odgovarati i biti pitani u šta smo ga iskoristili. AMIN!



بِسْمِ اللّٰهِ الرَّحْمٰنِ الرَّحِیْمِ

ISLAMSKA ZAJEDNICA U BOSNI I HERCEGOVINI

www.rijaset.ba



AKOS
ASOCIJACIJA ZA KULTURU
OBRAZOVANJE I SPORT

Bemuf Vjerom u budućnost